

याकोब याकोब रासता सिट्टि

इद सिट्टिता बारेमते गिचचो परिचयम

रासतोना पोरोल: याकोब

रासता कालम: इसवि सन 45-50

याकोब येसु सामिना तम्मुर आंदुर. लोकल्लक, पेनदा विस्वासुल्लुकुन तकलिप कियुंदुर. अदुनहाटी विस्वासुल्लक वैरे-वैरे देसेमते पेय्से होत्तुर. ओर्क दैरनेम हियालय याकोब इद सिट्टि रासतोर.

मीक तकलिप वायिना आनंदमते ओप्केते अदुन ओर्सकुंट, गरिब आयिर सिरमंत आयिर बेदबाव कियमट, इच्चाना पज्जो ताकसि पापम कियमट, विस्वासमते कबळ कीम्टु, नाल्केतुन आपट, पेदिदरकेम कियमट आनि विस्वासमते गट्टिगा निल्लिस मंटु इंचि विस्वासुल्लुकुं वेहतोर.

बगा बतल मंता

जोहार आनि परिचयम 1:1

विस्वासम आनि बुद्धि 1:2-8

गरिबतनम आनि दनम 1:9-11

पट्टु हळमळ आनि परिक्सा 1:12-18

केंजमळ आनि कियमळ 1:19-27

बेदबावम कियमळ बारेमते 2:1-13

विस्वासम आनि बेस कबाहक 2:14-26

विस्वासि आनि ओना वळकमळ 3:1-18

विस्वासि आनि दुनिया 4:1-5:6

समजांचि वेहामळ 5:7-20

जोहार

1 नना याकोबुन, पेन आनि सामि येसु किरिस्तुना सेवकुन आंदुन. वैरे-वैरे देसेल्लुकुने पैलांचि होंचि मत्ता पन्नेडु गोत्राल्लुकुनोर्कुंक* नना इद सिट्टि रासेके

* 1:1 पन्नेडु गोत्राल्लुकुनोर्कुंक ईर यहुदि विस्वासुल्लक आंदुर, ओरा देसेमताल पलाते एक्कोते-एक्को सिरिया आनि आसिया एरियाते मंचेके मत्तुर.

मंतन. मीक अंतोर्क जोहार.

परिक्सां आनि आनंदम

2 नावा विस्वासुल्कुनिटा, बस्के अय्ते मीवापोर्री तीर-तीराता परिक्सां वांतां, अस्के अद मीवा पूरा आनंदमता पोल्ले इनकुंदु.

3 बारित्ते विस्वासमता परिक्सानाहेंदाले ओप्के पुटंता इंचि मीक एरपाटे मंता.

4 मिमेट ओप्केतुन दाना कबळ पूरा किया हीम्टु, अस्के मिमेट विस्वासमते गट्टिगा, पुरागा आनि बवे पोल्लेने बतले तक्को हिलाकोटा आंतित.

5 गानि मीवा लोपोटाल बोनकन्ना बुद्दि तक्को मत्ते पेनदुन तल्कट, अस्के पेन हीता. बारित्ते अद बतले तप्पु दोस्साका, तल्कतोर अंतोर्कुंक वेल्लेने हीता.

6 गानि अनमानम कियाका विस्वासमते तल्कमळ गावाले. अनमानम कियानोर समुद्रमते वळिक वायाना एता तळानसंतोर आंदुर.

7-8 असंतोर रौडु तीस्कुने विचारम कियाना मनकल आंदुर, ओर बदे हर्दे गट्टिगा मन्नोर. अदुनहाटीं सामिनाहेंदाल बतलन्ना दोर्कता इंचि इनकुना मन्नि.

गरिब आनि सिरमंतुड

9 गरिब विस्वासि, पेन ओनकु हीता पेद्दातनमता हेंदाल आनंदमते मंदना.

10 अल्हेन सिरमंत विस्वासि, पेन हीता सिन्नातनमता हेंदाल आनंदमते मंदना. ओर जाडि पुंगार राल्सि होत्ताप हासि दांतोर.

11 बारित्ते पोळ्दु पेयसंता अस्के एराना एद्दि मनंता, दानहेंदाल जाडि वतसि दांता, पजा दाना पुंगाहक्क राल्सि होंचि सिंगारम हिलाकोटा आंता. अल्हेने सिरमंत मनकलगुडा ओना कमाइ कियाना विचाराल्कुनेन मुळिगसि मंचि नासडेम आसि दांतोर.

12 बोर अय्ते परिक्सां वातस्के अवुन ओर्सकुंतोर, ओर आसिर्वाद दोर्कतोर आंदुर. बारित्ते परिक्साने गट्टिगा नित्तिसि मंचि बोर अय्ते पेनदुन पावरम कीतोर, ओनकु पिस्वरता किरिटम हीतन इंचि पेन पोल्ले हीसि मत्ता, अद ओनकु हिय्यार.

13 पेन परिक्सां वाया हिय्यो अल्हेन बोर्कुने परिक्साने अरहो. अदुनहाटीं बोर्कन्ना परिक्सां वायानय्ते, पेनदाहेंदाले परिक्सां वासेक मंतां इंचि इना मन्नि.

14 गानि हरेक मनकन, ओना लालच दानहेके गुंजकुंता. पजा पसांचि, ओन परिक्साते अरहंता.

15 आयंका आ लालच नेला तप्सि एरपूरताप, पापमतुन कनंता आनि पापम बेर्सि हामुरतुन पुटसंता.

16 नावा पावरमगल्ला विस्वासुल्कुनिटा! मिमेट पसांचकुनमट.

17 हरेक बेसता वरम आनि अन्निकन्ना बेसता इनाम पोर्रीटाले वांता, वेल्गुल्कुना पेनबाबानगटाल वांता, ओनालोप्पो बतले तेडा हिल्ले, ओर नीडातालेसीं बदलांचानोर आयोर.

18 ओर पुटिस्तवुन लोप्पो मोट्टा मोदाटा पलम मनमे आयागोम इत्ता ओना सतता इच्चातुन पीसि, सत्तेम पोल्लेताल मनाकुन पुटिस्तोर.

केंजमळ आनि केंजताप ताकमळ

19 नावा पावरमगल्ला विस्वासुल्कुनिटा, मिमेट इद पोल्ले तेल्लिचकुंटु, हरेक मनकल केंजालय बिराना तयार मंदना, वळ्कालय ओप्के मंदना आनि बिराना होंग वायाकोटा मंदना.

20 बारित्ते मनकना होंग पेनदा नीति पोर्री कबळ किय्यो.

21 अदुनहाटीं मीलोप्पो मत्ता कराब पोल्लेन आनि दुस्ट मनसुन तेंडसि पोहाचि, पेन मीवा मनसुने हीता बेसता पोल्लेतुन मिमेट पेद्दातनम ह्ळाकोटा पीकुंटु. बारित्ते अद मीवा आत्मान पिसागोटनाहाटीं बलमतद आंद.

22 अद पोल्ले सिराप केंजालये आयो गानि अद वेहताप ताकानोर आम्ट. अल्हा ताकाकोटे मीवद मिमेटे पसांचकुंतिर.

23-24 बारित्ते बोर अय्ते पेनदा पोल्ले केंजसि अदुना परकारम ताकोर, आ मनकल अद्दमते मोकम ह्ळसि पलाते होत्ता पजा बल्हा मत्तानो इंचि बिराने मरंगनसंटोर आंदुर.

25 गानि बोर अय्ते मुक्तिता तप्पु हिल्ला नियम मत्ताप ताकंतोर आनि अदुन मरगोर, असंटोना कबळ लोप्पो पेनदा आसिर्वाद मनंता.

26 बोरन्नागिटा ओनद-ओर बक्तुन इनकुंतोर गानि ओना नाल्केतुन आपकुन्नोर, अय्ते ओर, ओनद-ओर पसांचकुंचेके मंतोर. ओना बक्ति एर्मे आंदु.

27 बोर अय्ते दिक्कु हिल्वोर्कुना, मुंडामोस्तवुना तकलिप लोप्पो सहायम कींतोर, इद दुनियाता कराब कबाहकुनाल लक्कु मनंतोर, असंटोर मना पेनबाबाना मुन्ने दोसेम हिल्वोर पवित्र आंदुर.

2

बोनद बेदबाव कियामान्नि

1 नावा विस्वासुल्कुनिटा! मीवा विस्वासम मना महिमाता सामि येसु किरिस्तुनपोर्रो मंता, अदुनहाटी मीलोप्पो बेदबाव मनामान्नि.

2 बारित्ते, वरोर मनकल बंगारमता मुद्दा, एक्को दरातव कपडिं केर्सिं, इंकावरोर गरिब मनकल बोंतुल कपडिं केर्सिं पारतना कियाना लोते वातुर इनकुंटु,

3 अस्के मिमेट एक्को दराता कपडिं केर्सिं वातोनहेके हळसि, “निमे इगे बेसता जेगाते उद्दा” इंचि वेहचि, गरिब मनकन, “निमे अगा नित्ता हिलाकोंटे नावा काल्कुनगा उद्दा” इंचि वेहानय्ते,

4 मिमेट मीवा लोप्पेन बेदबाव कीताप आया हिल्लिरा? इंका दुस्ट विचारमते न्यायम कीतोर आया हिल्लिरा?

5 नावा पावरमगल्ला विस्वासुल्कुनिटा! केंजाट, ई दुनियाते बोर अय्ते गरिब मंतुर ओर्कुन विस्वासमते दनवंतुल्क कीतन इंचि, आनि दान पावरम कीतोर्कुंक दाना राज्येमते वारसदार्क कीतन इंचि, मुन्नेने पोल्ले हीसि मत्ता, अद हियालय ओर्कुन पेस्ता.

6 गानि मिमेट आ गरिब मनकन अपमानम कीतिर. मीपोर्रो अदिकारम ताकिच्चेके, मीकुन कोरटते इग्गिसेक ओयानुर दनवंतुल्के गदा?

7 किरिस्तुना कदर हियना पोरोल मीक दोर्कता, अद पोरोलतुनगुडा अपमानम कियानुर ईर दनवंतुल्क गदा?

8 मिमेटगिंटा, “नीवद-निमे पावरम कीतापे पक्कातोर्कुनगुडा पावरम कीम,” इंचि दर्मसास्त्रमते वेहताप ताकानय्ते, मिमेट निजमे बेस कीसेक मंतिट.

9 गानि ओक्कला मिमेट बेदबाव कियानय्ते, मिमेट पापम कीसेक मंतिट, दर्मसास्त्रम मीकुन दोसिल्क कीता.

10 बारित्ते बोरें आयिर दर्मसास्त्रमतव अन्नि पोल्लेन पालन कीसिगुडा उंदि पोल्ले तपते, ओर अन्नि पोल्लेने दोसि आंतोर.

11 बल्हा इत्ते, “बोगमतनम कियमट” इंचि पेन वेहता, आनि अदे पेन, “इंकावरोन हक्कमट” इंचिगुडा वेहता. निमे व्यबिचारम किया हिल्लिन गानि इंकावरोन हक्कतिन, अय्ते निमे दर्मसास्त्रमता पालन किया हिल्लिन.

12 बोरद अय्ते पापमताल इळबळिचना नियम परकारम न्यायम आयाना मंता. मिमेट ओरालेसीगे वळ्कट, कबळ कीम्टु.

13 बारित्ते बोर अय्ते दया किय्योर, न्यायम कियाना रोज पेन ओनपोर्रो दया किय्यो. दया कियानोर न्यायमतुन गेल्संतोर.

विस्वासम आनि बेसता कबाह्क

14 नावा विस्वासुल्कुनिटा! बोरन्नागिंटा नाक विस्वासम मंता इन्कुंचि, विस्वासम परकारम कबळ कियाकोटे, अद विस्वासम बता पायदातद असोटा विस्वासम ओन पिसागोटा परंतना?

15 बोरन्ना दादाल आयि, अक्कल आयि ओर्क केरालय कपडिं, तिनालय रोजता तिंडि हिल्ले,

16 अस्के मिमेट ओर्कुन, “सांतिते होंटु, गरम कपडिं केरंट, पीरमेड तिट्टु,” इंचि इनकिर. गानि ओरा मेंदुल्क अक्सरम मत्तव ओर्क हिथ्यिर, अय्ते दाना बता पायदा?

17 अल्हेने विस्वासम मत्ताप कबळ हिलाकोटे, आ विस्वासमगुडा हातापे आंद.

18 गानि बोरन्ना, “नीकु विस्वासम मंता, नाक बेसता कबळ मंता” इंचि इत्तोर इनकुंटु. अस्के, “बेसता कबळ हिल्ला विस्वासम नाक हुप्सा, बेसता कबळताहेंदाल विस्वासम नीकु हुप्संतन” इंचि ओर इनानुर.

19 पेन उंदे मंता इंचि मिमेट विस्वासम कीतिर, बेसे आंद. गानि देय्याल्कुगुडा विस्वासम कीसि गजा-गजा वनकंतां.

20 अरे बुद्धि हिल्ला मनका! कबळ हिल्ला विस्वासम एर्तम इंचि, नीकु तेळियोना?

21 मना एनकटा बाबो अब्राहाम ओना मरिं इसाकुन मोक्कु हियालय गद्देपोर्रो इरतोर, अय्ते पेन ओना कबळतुन हळसि, नीतिमंतुड इंचि ओन ओप्कुत्ताना हिल्लेना?

22 मिमेट हळसेक मंतिट, विस्वासम ओर कीता कबाह्कुनतोनि कलियसि मंता, अल्हेन विस्वासम ओना कबाह्कुनाहेंदाल पूरा आता.

23 अय्ते, “अब्राहाम पेन पोरो विस्वासम कीतोर, अस्के पेन ओन नीतिमंतुड इत्ता,” इंचि दर्मसास्त्रमता पोल्ले पूरा आता. अल्हेने अब्राहाम पेनदा दंटातोर इंचि पोरोल दोर्किचुकुत्तोर.

24 अदुनहाटीं मनकल सिराप विस्वासम कीतिने आयो गानि बेसता कबाह्कुनालगुडा पेन ओन नीतिमंतुड कीता.

25 अल्हेने रहाब इनना वेस्यागुडा कब्र्यालोर्कुन दाना लोते मक्किचि इर्सिं, इंकुंदि हरदाल वापस लोहता. अद बेसता कबळ कीताहाटीं नीति मुरतळ आता.

26 बल्हा अय्ते आत्मा हिल्ला मेंदुल हांतानो, अल्हेने कबळ हिल्ला विस्वासमगुडा हातापे.

3

नाल्के तळमितसोंटद आंद

1 नावा विस्वासुल्कुनिटा! मिहागटाल वेल्लेटुर कराहनोर आयमट्ट, बारित्ते मनम कराहनोर्कुंके वेल्ले गट्टिगा न्यायम जर्गता इंचि मीक एपाटे मंता.

2 मनम अंतोरम बच्चंगो तप्पुक कीतोम, गानि बोर अय्ते वळ्कानेंके उंदिगुडा तप्पु किय्योर, ओर अन्नि गुनाल्कुने पूरा मत्ता मनकल आंदुर आनि ओर ओना मेंदुलतुनगुडा पग्गमते दोहताप ईरा परांतोर.

3 गुर्रम मना कय्दे ताकागोम इंचि दाना तोड्डिते कल्लेम दोसंतोम, अस्केने दाना पूरा मेंदुलतुन तिरहा परांतोम.

4 अल्हेने डोंगन ह्ळ्वाट, अव वेल्लेन पेद्दगा मनंतां, वेल्ले वळिते ताकंतां, अय्नागानि अवुन ताकसानोर सिन्ना पतवार* हेंदाल बेके इत्ते हेके तिरहा परांतोर.

5 अल्हेने मना मेंदुलते सिन्ना नाल्के मंता, अद पेद्दा-पेद्दा पोल्लें पोंगंता. ह्ळ्वाट, सिन्ना मिन्गुरते पेद्दा केडा वेसि दांता.

6 मना नाल्केगुडा तळमितालेसीं मंता. दानगा अन्नि कराब पोल्लें निंडसि मंतां. अद मना मेंदुलते मंचि पूरा मेंदुलतुन बदनाम कीसि मना पिस्वरते तडमि दोसंता. अद तडमि नरकमताल वांता.

7 बारित्ते अन्नि तीरकुना केडा जिवरासीं, पिट्टें, पुळ्कु आनि समुद्रमते मंदना जिवरासिन मनकल ओना कय्दे कीकुन्ना परांतोर, कीकुरतोरगुडा.

8 गानि नाल्केतुन आपमळ बोनतोने आयापररीं. अद आग्वद, कराबतद आंद. दानगा हामुरता विसम निंडसि मंता.

9 इदुनतोने मनम मना सामि पेनबाबाना स्तुति कीतोम, आनि इदुनतोने मनम पेन दाना रूपमते पुटिस्ता मनकालोर्कुंन सापनेम हीं तोम.

10 उंदे तोळ्दाल आसिर्वाद, सापनेम रोंडु पेय्संतां, नावा विस्वासुल्कुनिटा, इल्हा आयामान्नि.

11 बतल, उंदे ऊटाताल उनाना एर, होव्वोर एर रोंडु पेय्संतंगं?

* 3:4 पतवार डोंगा ताकसेक मनानेके दान हेके-हीके तिराहनाहार्टी स्टेरिगतुन मेलाहते पतवार मेसलिसि डोंगा बरोबर दांता. पतवार डोंगाता हिळ्ळ एते मनंता.

12 नावा विस्वासलुकुनिटा, अंजिर मराकु जयतुन पंडिं हादांतंगा हिलाकोंटे अंगुर वेलिक अंजिर पंडिं हादांतंगा? हादों. अल्हेने होव्वोर एता ऊटाताल, उनाना एर पेयसा परीं.

देय्यालुकुना तेल्वि आनि पेनदा तेल्वि

13 मीलोप्पो तेल्वितोर, तेळियतोर बोर मंतोर? ओर ओना बेसता पिस्वर हेंदाल, तेल्विते सीदा-सादा मंचि ओर कियाना कबाहकुन हुप्सना.

14 गानि मीवा मनसुने वेल्लेने कूटा-कूटा, लालचता इच्चां निंडिस मत्ते, नीवा तेल्विता बारेमते पेद्दिदरकेम कीसि, सत्तेमता विरोदमते पापम कियामान्नि.

15 ई तेल्वि पोरोटाल रेय्सी वातद आयो, गानि दुनियातागटाल, मनकनगटाल आनि देय्यमतगटाल आंद.

16 बल्हा इत्ते, बगा अयते कूटा-कूटा आनि लालचता इच्चां मनंतंगो, अगा आपत्ति आनि अन्नि तीरकुना कराब कबाहक मनंतां.

17 गानि पोरोटाल वायाना तेल्वि अद मोदाला अयते पवित्र मनंता, आयंका सांति हियानद, सीदा-सादा गुनमतद, इंकावरोना पोल्ले केंजालय तयारते मनानद, दया आनि बेसता कबाहक कियानद, अद बेदबाव कियवद, इमानदारते मनानद आंद.

18 सांतितुन वरोंक-वरोर कल्पानोर्क, सांतिता विज्जाता हेंदाल नीतिता पंटा दोर्कता.

4

मनालोप्पो जगडाल्क आयाना कारनम

1 मीलोप्पो लडाईं, जगडाल्क, आयाना कारनम बतल? मीलोप्पो मंदना कराब आसेना लडाइताहेंदाले गदा.

2 मिमेट इच्चा कीतिट गानि अद मीक दोर्को, अदुनहाटीं मिमेट इंकावरोन हक्कंतिर. गावाले इंचि इनकुंतिर गानि अद मीक दोर्को, मिमेट लडाईं, जगडाल्क कीतिर. अयते मीक दोर्कवा कारनम बतल इत्ते, मिमेट पेनदुन तल्कसेक हिल्लिर.

3 मिमेट तल्कंतिर गानि मिमेट मीवा सुकमताहाटीं कराब आसेतेन तल्कंतिर, अदुनहाटीं मीक दोर्को.

4 विस्वासम हिल्वोरिटा! दुनियातोनि दंटा कियमळ इत्ते पेनदुक पगा आयमळ इद मीक तेळियोना? अदुनहाटीं बोर अयते दुनियातोनि दंटा कीतोर, ओर पेनदुक पगातोर आंतोर.

5 दर्मसास्त्रमते वेहता पोल्लें एर्तमे इंचि मिमेट इनकुंचंतिरा? बद पवित्र आत्मातुन अय्ते पेन मनालोप्पो इरता, अद मना नुकसान आयगोम इंचि कोरंतना?

6 पेन अय्ते इंका एक्को कुर्पा कींता. अदुनहाटी, “पेन पेद्रिदरकेम कियानोर्कुंक विरोद कींता आनि सिन्नातनम आसि मनानोर्कुंक कुर्पा कींता,” इंचि दर्मसास्त्रमते रासि मंता.

7 अदुनहाटी पेनदा पोल्लेपोर्रो ताकट, देय्यमकु एदुर तिरियट. अस्के अद मिहागटाल वित्तंता.

8 मिमेट पेनदुक दग्गेरा वट, अस्के पेन मीवा दग्गेरा वांता. ए पापि लोकरिटा! मीवा पापाल्कुन नोर्राट. रौंडु मनसुकुने ताकानोरिटा, मीवा मनसुन साप इर्राट.

9 पापि लोकुल्लुकुम इंचि दुक्कमते मंटु, अळट. मिमेट कव्वानद होळसिसि दुक्कमते मंटु, आनंदमते मनानद होळसिसि नाराजते मंटु.

10 सामिना मुन्ने मिमेट सिन्नातनम आसि मंटु, अस्के मीकुन पेन पोर्रोळ्ळक तेहांता.

तप्पु दोसना अदिकार मीक हिल्ले

11 विस्वासुल्लुकिटा! वरोना-वरोर अपमानम कीकुनमट, बोर अय्ते ओना दंटातोण अपमानम कींतोर, ओनपोर्रो तप्पु दोसंतोर, असोटा मनकल दर्मसास्त्रमता अपमानम कींतोर, दानपोर्रो तप्पु दोसंतोर. अय्ते निमे गिंटा दर्मसास्त्रमपोर्रो तप्पु दोसते, निमे नियम परकारम ताकानोन आयिन गानि न्यायम कियानोनालेसी आंतिन.

12 दर्मसास्त्रम हियानद आनि न्यायम कियानद पेन उंदे आंद. दानके पिसागोटना आनि नासडेम किय्याना ताकत मंता, गानि निमे बोन आंदिन पक्कातोणपोर्रो तप्पु दोस्सानोन?

मना पिस्वर पेनदा कय्दे मंता

13 केंजाट, “इय्याला हिलाकोटे नाडि पलाना सहरते होंचि, वसामेड मंचि, दंदा कीसि कमांचकोम,” इंचि मिमेट इंतिट.

14 गानि नाडि बतल आंता मीक तेळियो, मीवा पिस्वर इत्ते गळसेम दिस्सि मर्रा दिसाकोटा आयाना मूळमतसोंद आंद.

15 अदुनहाटी मिमेट, “सामिना इच्चा मत्ते मनम जीवाते मंदकोम, इदो, अदो बदो उंदि कबळ कीकोम,” इंचि इनमळ गावाले.

16 गानि इंदके मीवा पोल्लेने मिमेट गरंते मनंतरि, इसोंटा अन्नि तीरकुना गरं बेस आयो.

17 अदुनहाटीं बोर अयते बेस कबळ कियाना इंचि तेळियसिगुडा ओर कियार्कोटे, ओनाहाटीं अद पापम आंद.

5

दनवंतुलकुंक वेहमळ

1 दनवंतुलकुनिटा, केंजाट! मीपोरों वायाना गंडालकुनाहाटीं वरगेयाटु, अळट.

2 मीवा दनम नासडेम आंता, मीवा कपडिन सेदेल पीता.

3 मीवा बंगारम, एंडि सिलुम पीता. अद सिलुम मीक अड्डम गवाइ वेहचि, तळमितालेसीं मीवा मेंदुल्लुन नासडेम कींता. मिमेट ई आकिर युगमतेगुडा दनम जमा कीसेक मंतरि.

4 हुळाट! मीवा नेदे कबळ कीता बूतिनोर्कुंक मिमेट बूति हिया हिल्लिर, अद बूति मीक अड्डम वरगेयसेक मंता, बूतिनोर्कुना अळमळ स्वर्गमते मंदना बलमगल्ला सामिना केव्कुंक केंजावाता.

5 मिमेट ई दुनियाते अन्नि तीरकुना आरामते, सुकमते पिस्तिर आनि मिमेट हायना रोजुनाहाटीं मीवा मनसुन बल्सागोटतिर.

6 नीतिमंतुनपोरों मिमेट दोसेम दोस्सि हव्कतिरगुडा. गानि ओर मीपोरों मर्लाबळा हिल्लोर.

ओप्केते ताकाना

7 अदुनहाटीं विस्वासुलकुनिटा! सामि मरं वायानादाका ओप्के पीसि मंटु. बल्हा इत्ते, वरोर कास्तकारि मनकल ओना नेदा पिस्वरता पंटाहाटीं मोदाटा पिर्फ आनि आकिरता पिर्फ वायानादाका ओप्केते एदुर हळांतोर,

8 अल्हेने सामि मल्लिस वायना वेला दग्गेरा वासि मंता. अदुनहाटीं मिमेटगुडा मीवा मनसुन गट्टिगा कीसि, ओप्केते मंटु.

9 विस्वासुलकुनिटा! वरोनपोरों वरोर चुगलीं वेहमट, अल्हा वेहतिर इत्ते मी पोरोने दोसेम दोसमळ जर्गता. हुळाट, न्यायम कियानोर गलमातगा नित्तिसि मंतोर.

10 विस्वासुलकुनिटा! सामिना पोरोलता बारेमते वेहता पेनदा कबुरतोर तकलिप बोंगाचिगुडा ओप्केते मत्तुर, मिमेटगुडा ओरालेसीं मंटु.

11 हुळाट! बोर अय्ते ओप्के पीसि मत्तुर, ओर्कुन आसिर्वाद दोर्कतोर इंतोम. अय्यबूब* ओप्के पीसि मत्ताहेंका ओन्क पेनदाहेंदाल आसिर्वादगुडा दोर्कता इंचि मिमेट केंजतिरे. इदुनहेंदाल पेन एक्को जीवा कियानद, दया कियानद आंदु, इंचि तेळियंता.

12 गानि नावा विस्वासुल्कुनिटा! अन्निकन्ना पेद्दा पोल्ले बतल इत्ते, मिमेट स्वर्गमतद आयि, बूमितद आयि आनि बदे पोल्लेतद आयि ओट्टु तिनमट. मत्ते मंता इंट, हिलाकोटे हिल्ले इंट. इल्हा इत्ते पेन मीकु सिक्साता आदेस हिश्यो.

पारतनाता ताकत

13 मीवा लोप्पोर्गिटा बोरन्ना दुक्कमते मत्ते ओर पारतना कियाना, आनंदमते मत्ते पेनदा स्तुति कीसेक पाटां पाराना.

14 मीवा लोप्पोर्गिटा बोरन्ना बिमारते मनानय्ते, कलिसियाता पेद्दाल्कुन केयाना. ओर वासि सामिना पोरोलते ओनकु निय होकसि, पारतना किथ्थिर.

15 ओर विस्वासमते कीता पारतनाते बिमारतोर बेस आयानुर. सामि ओन बिमारताल तेहाचि निप्संतोर, ओर पापम किथ्थिनागानि ओना पापमतुन मापि कीतोर.

16 अदुनहाटीं मिमेट वरोना मुन्ने वरोर मीवा पापाल्कुन ओप्कुट्टु, वरोनाहाटीं वरोर पारतना कीम्टु, अस्के मिमेट बेस आकिट. नीति मनकना पारतनाते वेल्लेने ताकत मन्ता.

17 एलियालगुडा† मनासोंटा गुनमता मनकल मत्तोर, ओर पिर्ई वायामन्नि इंचि ऊके-ऊके पारतना कीतोर, अय्ते मूडुननरा वर्सनदाका बूमिपोर्गे पिर्ई वाया हिल्ले.

18 दाना पजा, पिर्ई वायागोम इंचि मर्रा पारतना कीतोर, अस्के मब्बुनाल पिर्ई वाता आनि बूमिपोर्गे पंटा पेय्सता.

19 नावा विस्वासुल्कुनिटा! मीवा लोप्पोटाल बोरन्ना सत्तेमता हरदाल तप्सि होनानय्ते, ओन इंकावरोर बोरन्ना सत्तेमता हर्दे वापस थायाना.

20 ओनकु इद तेळियना गदा, बोरन्ना सत्तेमता हरदाल तप्सि होत्ता पापि मनकन, सत्तेमता हर्दे वापस थायते ओर ओना जीवातुन हामुरताल पिसागोटतोर आनि ओना अन्नि पापाल्कुन मुच्चि हीतोर.

* **5:11** अय्यबूब अय्यबूब पोरोलता वरोर मनकना बारेमते पडाना नियमते रासि मंता. ओर पेनदा बेसता बक्तुड मत्तोर. † **5:17** एलियाल पडाना नियम मत्तस्के ईर पेनदा पेद्दा कबुरतोर मत्तोर.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068